

بره الصندوق

مسرحية

من

فصل واحد

تأليف

ممدوح فهمي

تقديم

فتحى العشرى



التجهيزات الفنية والطباعة
دار يسطرون

للطباعة والنشر والتوزيع
طباعة وتوزيع الكتب في جميع أنحاء العالم
المكتبة والمطبعة : ٣ ش صفوت - محطة المطبعة
شارع الملك فيصل - الجيزة
جمهورية مصر العربية
٠١١٥٧٧٦٠٠٥٢ - ٠١٢٢٩٣٠٠٠٢٩
تصميم و إخراج : أحمد عبد الحليم
رئيس مجلس الإدارة : عماد سام

جميع حقوق النشر والطباعة
محفوظة للمؤلف

ويحظر التصرف في العمل بأي صورة من الصور
إلا بإذن كتابي موثق قانونا

كتابات مسرحية

بره الصندوق

مسرحية
من
فصل واحد

تأليف
ممدوح فهمي

تقديم
فتحي العشري

تصميم الغلاف
عادل وديد

تنفيذ



الطبعة الأولى

رقم الايداع

٢٠١٧ / ٢٠٨٦٩

الترقيم الدولي

978 - 977 - 776 - 498 - 8

للتواصل الالكتروني

مع المؤلف

E: mamdouhfahmy4@yahoo.com

facebook ممدوح فهمي

بره الصندوق

«برة الصندوق» ليس بالضرورة أن يعنى هذا أفكار
جديدة فريما يعنى أيضاً ما خسرناه من معرفة فى
السابق

م.ف

مقدمة

برغم الرصانة التي عرف بها الأديب ممدوح فهمي في مسرحياته المنشورة السابقة إلا أنه يتجه في مسرحياته الجديدة التي كتبها مؤخراً وهي من مسرحيات الفصل الواحد ومنها تلك المسرحية "بره الصندوق" فقد اعتمدا في تناولها على الكوميديا السوداء التي تميل أحيانا إلى ال (Farce) المليء بالإفهات و القفشات و المواقف المتأزمة التي تحتاج في حلها " فهلوة " أولاد البلد الذين يبررون أفعالهم لخدمة أفكارهم التي تبحث و تصل إلى حلول للخروج من المأزق ، و مع هذا لا يتخلون عن الشرف و الأمانة رغم إحتياجهم الشديد في بعض المواقف كما سنرى في المتابعة ..

نتعرف في تلك المسرحية على زوج و زوجته تضيق بهما الحياة في إنتظار الفرج الذي لا يجيئ، يعثران في صندوق قمامة جارتهم صاحبة العقار على كيس نقودها الكفيل بفك أزمتهم، مما يدفع الزوجة لمحاولة الحصول على ما بداخله من مال مبررة ذلك لزوجها بأن هذا يعتبر نوع من الإقتراض و سوف تعيدهم مستقبلا بطريقة أو أخرى إلى صاحبتة حين تفرج لكن الزوج يرفض هذا جملة و تفصيلا خاصة مع تشكك صاحبة المنزل فيهما و إن كان بشكل غير دامغ

تحدث المفاجأة للزوج و الزوجة و تفرج بالفعل من خلال جار آخر لهما بالمتزل يكشف عن مكافأة غير متوقعة تأتي لهم صدفة بمال ضخيم فيقرران ترك المتزل إلى متزل آخر و تسليم صندوق القمامة بما يحويه لصاحبه التي قهّل لعودة الكيس الذي يحتوى على نقودها و ذهبها و حججها التي إدعتهم زورا بتواجدهم أيضا داخل الكيس

و قد حرص الكاتب في عرض مسرحيته و أحداثها على أن يستخدم اللغة العامية البسيطة و مفرداتها السائدة ليعبر عن شخصياته و تناسب حياتهم و الموقف الذي طرحه بخياله و إن كان واقعا حقيقيا الآن و ممكن أن نراه بشكل أو بآخر و تلك مسؤولية المفكر في إلقاء الضوء مبكرا على ما قد يتعاضم مستقبلا و ما يواكبه من تبعيات

فتحى العشرى

إستهلال للمؤلف

المسرح و ثلاثية المشاركة

إن المسرح حين يقدم عملاً فهناك ثلاثة أطراف لها حضورها و أهميتها و تشابكها الذى لا يمكن إغفاله .. بمعنى آخر لا يكون هناك روحاً أو معنى لما يقدم بدونها على الإطلاق .. و هذه الأطراف تشمل (النص المسرحى - القائمين بالتنفيذ - جمهور المشاهدين)

فمن ناحية النص المقدم فهو فكرة تعرض وجهة نظر كاتبها لموضوع ما و تعتمد فى سياق طرحها بالأساس على صراع بين أشخاص لإيجاد حالة من التتابع والتشويق للوصول فى النهاية إلى ما يراد طرحه للفكرة و إن اختلفت طريقة عرضها و قالبها سواء كان تراجيدى أو كوميدى أو عبثى ... أو غيرهم

كذلك فإن فريق العمل القائم بالتنفيذ من إخراج و تمثيل و مؤثرات الضوء و الموسيقى و غيرها كل هؤلاء يشكلون جسر التواصل بين النص المكتوب و الجمهور المشاهد متسلحين بفنوتهم المتعددة في هذا المجال

يبقى أخيرا في تلك الشراكة الطرف الثالث و هو المشاهد الذى لا يمكن تهميشه أو تجاوزه عما يحدث أمامه على خشبة المسرح فهو المشاهد (الملك) كما يقال فى كل ما يطرح لكنه للأسف لم يستدعى للشهادة على الخشبة لأنه لم يكتب له دورا ليؤديه رغم أن دوره يفوق كل الأدوار فهو الذى يحكم على ما يعرض بالنجاح أو الفشل مباشرة و دون انتظار سواء للفكرة التى تقدم أو بإسلوب و طريقة عرضها فإذا كان العمل مقبولا ونال قناعته قدم له التحية و العكس صحيح

هنا اتوقف أمام مسؤولية قيمة الكلمة و الفكرة للكاتب اولا ثم مسؤولية إبداع القائمين على إيصال و ترجمة ما كتب ثانيا ليس لإسترضاء المتلقى بل لحقه الأصيل لوقته و عقله اللذان يشارك بهما فى تلك الثلاثية و ينطبق هذا أيضا على القارئ إذا كان العمل هنا بين ضفتى كتاب.. فالمشاهد للعرض المسرحى أو

القارئ لنصه لابد من الإعتراف الصريح و الواضح لشراكته في العمل كما أشرنا سابقا فبدون دوره تتحلل تلك الشراكة و تنتهى تماما ومن ثما لا يصبح هناك قيمة أو جدوى لما يكتب ويقدم .

ممدوح فهمي

بره الصندوق

الشخصيات

الزوج أحد السكان

سعد

زوجة سعد

ناهد

صاحبة العقار

عواطف

ساكن آخر

كرم

قبل رفع الستار

مع بداية الإطلام التدريجي لصالة العرض، وبين الدقات التقليدية لفتح الستار نستمع إلى صوتٍ يشبه صوت المذيعين في نشرات الأخبار.

ص. المذيع: أيها السادة .. جاءنا للتو واللحظة هذا البيان المهم .. صرح مصدرٌ مسئول وبناءً عليه .. فقد اتُخذ عدد من القرارات العاجلة لصالح الأخوة المواطنين.

أولاً: وقف العمل بقانون الوساطة والمحسوية، والعمل بقانون من جد وجد سيجاهد للأبد ...

ثانياً: يحق لأي مواطن استبدال نقاط الحبز بسيارة ليموزين أربعة راكب للحد من استخدامات التوك توك، وتوفيره للمهام الصعبة ..

ثالثاً: تخصيص سكن بالصحراء لكل أسرة بحيث يبعد مسافة عشرة كيلو مترات عن جارتها منعاً للزحام وما يتبعه من تحرش أو مشاحنات ...

رابعاً: إعفاء جراحات التجميل للأنف والثدي والشفافيف من أي مصاريف علاجية حفاظاً على العدالة الاجتماعية بين النساء غير القادرة والنساء القادرات .

خامساً: يتم صرف البترين والمياه وكروت شحن الموبايلات مجاناً لغير الحاصلين على الرقم القومي.

سادساً: لسلامة أمزجة الشعب وتماشياً مع مطالباته بذلك فقد أخطرت الجهات المعنية بشؤون المزاج بعدم تقاضي أي مستحقات من المستفيدين وإرسال الفواتير للخزانة العامة لصرفها فوراً وليلةً بليلة.

أخيراً: نخب بجميع المواطنين بعد سماع هذا البيان إحكام الغطاء على أنفسهم جيداً قبل النوم خوفاً عليهم من النزلات.. والله المستعان .

ينتهي المذيع من حديثه وتوقف الدقات إيذاناً لبدء العرض وقد أظلمت الصالة تماماً.

المنظر

تنقسم خشبة المسرح الي ثلث وثلثين .. الثلث الأول من اليمين عبّاره عن طريقة تفصل بين درجات الصعود في المؤخرة ودرجات الصعود في المقدمة وهي تتجه يمينا .. يتخلل تلك الطرقه وفي المنتصف يمينا باب شقه " عواطف " صاحبه المنزل وبجانبه صندوقاً متوسطاً للقمامه يقابله يساراً باب شقة "سعد " المستأجر والخالي امامه مثل هذا الصندوق .. والجو العام يوحي بأن هذا المنزل من المنازل القديمه بأحد الأحياء الشعبيه

أما بالنسبه للثلثين الآخرين علي يسار المسرح فهما يشكلان ردهه شقة " سعد " التي تأتي في المقدمة ويميزها الديكور المتواضع البسيط والذي يتكون من أريكة بالصدارة تضم دمية عروس للأطفال.. ويمينا مقعدين خشبيين يتوسطهما ما يشبه المنضده .. وهناك وعلي يسار تلك الردهه باب يؤدي الي إحدى غرف الشقه

يفتح الستار لتظهر ناهد الزوجه البسيطة الجميله في منتصف الثلاثينات وهي تخرج من باب الغرفه باليسار حامله بعض الملابس التي جمعتها بعد نشرها علي ما يبدو لتضعها علي الأريكه وتجلس بجوارها لتطبقها حيث تمسك بفستان لطفلة صغيرة وتتأمله في شئ من الحنو وتضمه الي صدرها ..

ناهد

(بلهجه شجن) ياترى يا حبيبتي عامله ايه انتي واخواتك الثلاثه.. مبسوطين ولا زعلانين .. كويسين ولا عيانين .. (ثم في تمنى) ياريت ربنا يكون وفق أبوكم وصلح بطارية الموبايل واشترى كرت ولو بخمسه جنيه لاجل ما نطمئن عليكم.. موش هانفضل رامين حملنا كده علي جدكم وجدتكم حتي في سؤالهم علينا " ثم بنبره غضب " شكلنا بقي مقرف (أثناء حديث ناهد وهي ترتب الملابس يصعد درجات السلم في مؤخره الطرقة الزوج (سعد) وهو في بداية الأربعينات ونراه وهو يحمل بعض (الأرغفه) ونلاحظ حفاظه علي الهدوء التام والحذر خاصة في مروره من أمام شقه (عواطف) صاحبه المنزل .. وها هو يدق في لطف شديد علي باب شقته الأمر الذى لا يلفت نظر ناهد الي تلك الدقات .. لكنه يعاود الدق علي الباب في صورة أقوى الي حد ما مما يسترعي انتباهها لذلك)

- ناهد (في قلق) مين .. مين اللي بيخبط ؟ ..
- سعد (بصوت منخفض) أنا يا ناهد .. افتحي ..
- (تنهض ناهد لتفتح الباب في شئ من التعجب والدهشه) ..
- ناهد (بصوت مرتفع بعض الشئ) من إمتي ياسعد بتخبط علي الباب .. موش معاك مفتاح ؟ ..
- (يدخل سعد وهو يشير لها لتحافظ علي الهدوء .. ويغلق الباب خلفه في حرص شديد) ..
- سعد (وهو يشير للخارج) وطى صوتك لا البعوه تسمعنا .. (ثم في لهجه إحباط) المفتاح ضاع مني عشان تكمل .
- (مع اتجاه سعد ليجلس تلاحقه ناهد لتأخذ عنه تلك الأرغفه التي يحملها) ..
- ناهد (في عدم اهتمام) ابقى خد مفتاحي وطلع عليه .. (ثم وهي تغير من لهجتها وفي اهتمام شديد) طمنى الأول .. استلمت الشيك ؟ ..
- سعد (في أسف) لا شيك ولا كمبياله ولا حتي جنيه تحت الحساب
- ناهد (وهي تصفع صدرها) ياواقعتهم السوده !! ..
- سعد منه لله اللي فكر الفكره النجسه دى للحكومه وخلاهم يبيعوا البلد حته حته .. قال ايه عشان المصانع بتخسر واستحاله تقوم علي رجليها ..

- ناهد (في اعتراض وحده) يعملوا اللي يعملوه .. المهم يدونا حقنا .
- سعد (في لهجة ذات مغزى) من اللي بيتهبر ولا اللي بيقولوا للناس احنا بعنا بيه ..
- ناهد من أى نصييه .. مش كفايه انهم قعدوا يزهدوا فيكم لحد ما خلوكم تكتبولهم استقاله ..
- سعد اسمها تخارج ياناهد موش استقاله ..
- ناهد يخرجهم عزرائيل من الدنيا ياقادر ياكريم ..
- سعد دى عالم محببه .. عمرك شفتي حد منهم بيموت ولا سمعنا حتي ان جاله انفلونزا ..
- ناهد حقه .. كلهم بيصغروا ويربربوا زى ما تكون صحتهم بتيجي علي أكل مال الغلابه (ثم في تساؤل سريع) والعمل ؟ ..
- سعد موش عارف .. آديني بلف شمال ويمين لحد رجله ما اتكسحت
- ناهد (بطريقه مفاجئه) رحت للراجل اللي كلمك عشان تمسك حساباته
- سعد (في أسف) بلغني ان واحد من قرابيه حصله اللي حصلي وكان لازم يسلمه الشغلانه بدالي ..
- ناهد (بعد لحظه تفكير) وصاحبك اللي قال هايسلفك فت عليه ؟ ..
- سعد (في إحباط) فت .. ومانبنيش من المشوار غير اني آخذ ثواب الجنازه ..

- ناهد** مات ؟ ..
- سعد** (وهو يشيح بوجهه للجهة الأخرى) مراته بعيد عنك .. الله يرحمها كانت ست طيبة ..
- ناهد** الله يرحمها .. (ثم وهي تنظر نحو الباب) ما بيروحش غير الطيبين (ثم بعد لحظه صمت) طب مافيش حد غيره تكلمه ..
- سعد** مافيش للأسف .. كل اللي كنت ممكن أميل عليهم زى ما يكونوا فاهمين الفوله وقبل ما ألح بكلمه ألاقهم بيصدموا لي اسطوانه الهم والغم والفقر اللي نازل عليهم ..
- ناهد** (في شئ من عدم اليقين) الناس بقيت وحشه ولا ظروفهم هي اللي خلنتهم كده ..
- سعد** موش عارف (ثم وهو ينظر في أنحاء المكان) ماظنش ان فيه حاجه تاني نقدر نبيعها ..
- ناهد** وحتى لو فيه ما عاdash ينفع (وهي تشير للخارج) بسلامتها ابتدت تاخذ بالها مننا كويس .. ويوماتي تخطب علي زى ماتكون بتظمن علي حبه الكراكيب انهم موجودين لاجل ما تظمن علي الأجره اللي علينا ..
- سعد** انا عاوز أفهم الوليه دى لإمتي هاتفضل ميتة علي الدنيا كده ومابتقدرش ظروف اللي حواليتها .. دى واحده لا ليها عيل ولا تيل ولا راجل أصلاً يورثها من أساسه ..

ناهد	انت عارف ياسعد ايه اللي مخلي عواطف دى ساكتة علينا ؟ ..
سعد	ايه ؟ ..
ناهد	لايني باساعدها في كل حاجه ..
سعد	مصاريف يعني ..
ناهد	(في دهشه) يعني ايه مصاريف ؟ ..
سعد	زى اللي عليه فلوس ويحبسوه ويشغلوه بيهم ..
ناهد	(باسمه) ياخي انت كل حاجه تطلعها حكاية ..
سعد	هي كده بالظبط واسالي فيها ..
ناهد	استتي بس .. النهارده وانا قاعده معاها حسيت ان غزالتها رايقة قمت مفهماها الوضع بالمفتشر والحال اللي احنا فيه ..
	تفكر قالتلي ايه ؟ ..
سعد	قالتلك هاأحبسه ؟ ..
ناهد	لا قالتلي خليه ينزل يشتغل مع برعي الجزار ..
سعد	(في تعجب) أشتغل مع برعي الجزار !! ..
ناهد	وانا ماردتش ؟ .. رديت طبعاً .. قولتها جوزى يعرف يمسك قلم وورقه .. موش سكينه وساطور .. ده واحد كان موظف كبير في شركه لا ليها أول ولا آخر ..
سعد	بلا نيله ده بتاع السكينه والساطور برقبته ويديله بالقديمه ..
	علي الأقل بيأكل عياله لحمه يوماتي ومغذيههم .. موش اللي لما

عياله لو جابت سيرتها يقوم عليهم ولا اللي عملوا فعل فاضح	
في الطريق العام .. اسكتي ..	
بمناسبه العيال .. سألتني عنهم وقالتلي وديناهم فين ..	ناهد
إيه هانكون اتصرفنا فيهم يعني ولا بعناهم ؟ ..	سعد
(عابره لسؤاله) قلتلها ان جدهم وجدتهم طلبوهم يقعدوا معاهم	ناهد
كام يوم ..	
آه لو كانوا قاعدين معانا موش عارف كنا هنعمل ايه؟..	سعد
قضا أخف من قضا .. ولو انهم قطعوا بينا وهاتجنن عليهم ..	ناهد
الواد عادل وحشني قوى ..	سعد
والباقيين لأ .. ولا ده عشان آخر العنقود ..	ناهد
كلهم معزه واحده .. بس ده بالذات بافتكر حر كاته واضحك	سعد
وخصوصاً لما يزنق علينا ..	
(بلهجة أسف) .. كانت أيام ..	ناهد
(بثقة) .. والأيام لسه موجوده ..	سعد
إدينى أماره ..	ناهد
مالك ياناهد .. انتي هاتعايريني .. مانت عارفه انها مسأله نفس	سعد
والنفس بعافيه اليومين دول ..	
انا باتكلم علي الحال اللي احنا فيه .. لا معانا حق الإيجار ولا	ناهد
معانا نصرف والولاد مهجرينهم ولا كأن البلد بتحارب في	

العدوان الثلاثى .. (ثم في تساؤل سريع) جبت كارت للموبايل ؟ ..

سعد منين ؟ .. مانت عارفه كل اللي معايا كان كام ٠٠٠

ناهد (في قلق) صرفتهم كلهم ..

سعد (في تهكم) اطمنى .. صرفت اللي صرفته والباقي وديته

البنك علشان يحطوه في الحساب الجارى .. (ثم بلهجه حاده)

أنا صرفت في المواصلات اتنين جنيه وجبت عيش باربعه

يبقى اللي فاضل معايا ايه ؟ ..

ناهد كنت جبت بيهم كروت فكه من اللي بيقولوا عليهم ..

سعد موش لما التليفون الأول يشتغل .. مانتي عارفه ان بطاريته

واقعه .. وبعدين انا محتاج كل مليم عشان أركب وأروح

الشركه لاجل مااسأل علي الشيك الجملي اللي موش عاوز

يطلع ..

ناهد قالوك هايطلع امتي ؟ ..

سعد منظره هايتحول لشيك خارجه وانتي اللي هاتصرفيه ..

ناهد فال الله ولا فالك (ثم وهي ترفع يداها بالدعاء) ربنا يديك

طولة العمر لحد ما تستلمه ونروح نجيب الأولاد من عند جدهم

ويتلم شملنا ..

سعد (وهو يشير بعلامة المضى) وبعديها أتكلم ؟ ..

- ناهد (برد مباحث) تتكل ايه بس ياأخي .. خليك انت نافعنا ..
- سعد (في تعجب) نافعكم !! .. يعني أول ما نفعي ينتهي .. أديها ..
- ناهد (وهي تعاني من شئ ما) اسكت شويه بقي .. أنا حاسه بمغص جامد ومش عارفه ليه نفسى غمه علي .. نفس الحاجات اللي بتحصلي لما اكون حامل ..
- سعد (صارخاً وهو ينتصب فجأه لهول الصدمه لما قالتة) لا ياناها .. لأ .. اوعي تكوني عملتيها ..
- ناهد هو انا لوحدى اللي باعملها ..
- سعد يعني حصل ..
- ناهد سيبني اسبوع ولا اتنين لحد ما تأكد واقولك علي النتيجة ..
- سعد فالحه بس تلسنى وتقولي إديني أماره .. أهه الأماره بانث ياهاشم واعترفتي بالجريمه ..
- ناهد بتعتبر ان اللي حصل ده جريمه ..
- سعد إلا جريمه .. ربنا ادالنا العقل عشان نفكر .. (ثم في تراجع) لكن عقل ايه في ساعه زى دى ..
- ناهد عديها بقي ..
- سعد بالبساطه دى .. هو احنا قادرين نأكل أربعة لما نجيب لهم خامس؟
- ناهد ربنا بيرزق وان شاء الله لا هاینسانا ولا هاینساهم ..

- سعد** و لا هينسالك عدم المسئوليه ٠٠ (ويرفع يده للدعاء) ربي لا
أسألك رد القضاء ولكني اسألك اللطف فيه ..
- ناهد** ده قضاء ياسعد ..
- سعد** اصبرى لما اكمل الدعا .. (ويعود للدعاء) ربنا لا تؤاخذنا بما
فعل السفهاء منا ..
- ناهد** سفهاء !! ..
- سعد** (مؤكدا) وبنجيب لروحنا المشاكل ..
- ناهد** (تعود وتمسك ببطنها مرة أخرى ونلاحظ أنها تهتز مع الألم
في حده) .. آه يابطنى آه ..
- سعد** ما تغلي شوية ينسون يمكن الحكايه تفك ..
- ناهد** هو انا عندى برد ولا واكله حاجه ثقيله تعبالي معدتي؟..
- سعد** رجعنا للمعايره ..
- ناهد** فت علي البقال ..
- سعد** (في تحدى) تاني هانعاير .. أفوت عليه ازاي بالتلاته جنيه
اللي معايا .. أفوت عليه ازاي ..
- ناهد** جايز يقولك انهم طلبونا من البلد علشان تليفونك مابيردش ..
وبالمره كنت تطمئه علي ان الفلوس جايه في السكه ..
- سعد** وده هاتفرق معاه في ايه ..
- ناهد** تفرق معاه انه لما يفكر ويضربها في مخه يقولك أعملها بجميله

وأشككله بدل ماخسر زبون ..

زبون ايه ده اللي مدوخه في الحساب من شهر وشويه .. **سعد**
منعول ابو البطن اللي بتزل البني آدم وتحوجه للي يسوى واللي
مايسواش .. حاجه تجن ..

ماحنا لازم ناكل ياسعد .. **ناهد**

ليه لازم ؟ .. **سعد**

علشان نعيش .. **ناهد**

وليه نعيش ؟ .. **سعد**

عشان نشوف .. **ناهد**

ايه اللي هانشوفه ؟ .. **سعد**

(وهي تقترب منه فى تودد) الدنيا ياسعد .. الدنيا فيها حاجات **ناهد**

كثير حلوه وموش كلها هم وغم زى مانت فاكر ..

انا كل اللي شايفه انها قاسيه وصعبه حتي وهي بتدى المتعه **سعد**

الوحيد للفقير .. ياخذها منها بعبطه بالليل (ثم وهو يشير

بعلامه الحمل علي بطنه) الصبح يلقي نفسه لابس في الحيط ..

(ثم يغير من لهجته وفي نغمه) ياللا .. بقولك ايه ..

قول يا حبيبي .. **ناهد**

ممكن اطلب منك طلب .. **سعد**

(يبدو انها قد فهمت شئ آخر) أنا عنيه ليك .. **ناهد**

وتنفذيه .. **سعد**

ناهد	(وهي تقترب منه في تودد) وأنفذ أبوه ..
سعد	بقول يعني لو ..
ناهد	(تستحثة علي الكلام) ياراجل خلص .. هي جراحه..
سعد	بقول يعني لو تسافرى انتي كمان لأهلك تبقي جميله منك
	وموش هانسهاك ..
ناهد	(وقد فهمت أخيراً) هو ده الطلب اللي عمال تقدمله وتأخرله..
	ده انا افتكرت انه ياما هنا ياما هناك ..
سعد	أهه حاجه تخف علينا شويه لحد ما استلم الشيك ..
ناهد	(بلهجة تفهم وتحدى) وأسيبك لواحدك ..
سعد	العفريت هاياكلني يعني؟ .. ماتخافيش .. أنا راجل واستحمل
ناهد	وأنا ست أعرف الأصول ..
سعد	انت ذنبك ايه في اللي احنا فيه ..
ناهد	وانت كمان ذنبك ايه ..
سعد	ذنبى اني اتحطيت في ورطه وموش قادر احلها ..
ناهد	الورطه انك اتجوزتني وخلفتك أربع عيال ..
سعد	هما تعبوا وانت تعبتى وعشان كده انا تعبان ..
ناهد	مين قالك اني تعبانة .. هو الجواز معناه ايه .. موش عشره
	طيبه بين اتنين كل واحد يخلص للتانى ..
سعد	ايه رأيك بقي اني حاسس اني هاخون العشره دى عن قريب ..

- ناهد** (محذره) تخونها؟ ..
- سعد** اول ما اطب وأدبسك في الهم اللي احنا فيه ..
- ناهد** تاني بتقولها ياسعد .. انت ليه غاوى تبشر علينا باننا نلوص في الدنيا من بعدك .. ليه عاوز تحرمنا من سندنا زى اى بيت فيه اللي معشش عليه ويحميه .. ليه ..
- سعد** (يبدو أن مشاعره قد تأثرت كثيراً من حديث ناهد له التي لا تخفي تأثرها هي الأخرى وها هو سعد يربت علي كتفها مواسياً) بس ياناها .. بس يا حبيبتي .. حقك علي انا غلطان .. بس .
- ناهد** لا ياسعد .. لو كنت بتحبني وبتحب ولادك صحيح أرجوك إياك تجيب السيره دى تاني ..
- سعد** حاضر .. وانتى كمان لو بتحبيني وبتحبي ولادك إياك تفهميني غلط في حكاية السفر اللي قولتها لك ..
- ناهد** (معاتبه) مانت لو بتفكر شويه كنت سألت نفسك أسافر بايه ؟.
- سعد** (في تأكيد) بالقطر ..
- ناهد** بالقطر ..
- سعد** أو بالأتوبيس .. الاتنين هايوصلوكي ..
- ناهد** واللي هايوصلوني دول موش ليهم أجره ولا بيوصلوا محبه وعلي ما تفرج .. قول ..

(سعد لا يجيب ويطلق برأسه أسفاً ويبتعد عن ناهد قليلاً حيث ينظر الي سقف الغرفة طلباً الي معونه السماء) ..	
(تقاطع الحاله التي هو عليها) خلليني معاك ..	ناهد
يابنت الحلال لازم تاكلي وتتغذى علشان اللي في بطنك ..	سعد
لغايه دلوقت ماتعتلش هم ٠٠ قدام هالباقي محتاجه للغدا ..	ناهد
(في استلام) اللي تشوفيه .. (في تذكر) بالمناسبه .. انتي موش جعانه ؟ ..	سعد
يعني ..	ناهد
يعني ايه .. ننسى الحكايه دى ..	سعد
(وهي تتفحصه) ممكن نأجلها شويه لو عايز ..	ناهد
طيب ياللا ..	سعد
(في ابتسامه) يارب ما يكون مخي راح لبعيد ..	ناهد
أنا باتكلم علي الأكل موش علي اللي في مخك ..	سعد
(وهي تنظر للأرغفه في تأفف) عيش وملح كالعادة ..	ناهد
نعمه غيرنا بيحلم بيها .. موش أحسن من السؤال ..	سعد
(في عدم اقتناع) قول الموت البطئ اللي بنموته ساعه ورا ساعه	ناهد
(في شئ من التحمس) تعرفي اني بافكر بجد أنفذ اللي قالت عليه اللي اسمها عواطف ..	سعد

تشتغل عند برعي الجزار ..	ناهد
ليه لأ .. الايد البطاله نجسه زى ما بيقولوا .. وكويس انها	سعد
شارت علينا بالشوره دى ..	
تعرف انها ست مقترية ..	ناهد
علشان عاوزاني اشتغل ..	سعد
لأ .. علشان بتتبطر علي نعمه ربنا ..	ناهد
موش فاهم ..	سعد
دخلت عندها النهارده وكانت قاعده تقشر كوسه علشان هاتعمل	ناهد
محشى ..	
ودى فيها ايه ؟ ..	سعد
قعدت تمسك كل كوسايه وتدوقها بلسانها ..	ناهد
تدوقها ؟ ..	سعد
آه .. وتقول آل ايه دى مره ودى حلوه معسله ..	ناهد
هي الكوسه كمان فيها المره والمعسله ؟ ..	سعد
حاجه جديده عمرى ما سمعتها ..	ناهد
كل واحد ليه طريقته .. بس احنا طول عمرنا بناكل الكوسه من	سعد
غير ما نعمل عليها إختبار ..	
رمت كتير .. حوالي كيلو .. لما بقيت هاتجنن ..	ناهد
طيب كنتي خديهم منها ..	سعد

ناهد	والله كنت عاوزه أعمل كده ..
سعد	بس كنتي هتقوليلها ايه ؟ ..
ناهد	كنت هاقولها آخدهم للفراخ ..
سعد	(في حده) احنا حيلتنا حدايات حتي !! ..
ناهد	(تشير له بالرويه) وطى صوتك ماتز عفش ..
سعد	مانتي بتقولي حاجات تفلق ..
ناهد	وانا قولتلك اني قولتلها .. انا فضلت ساكتة لحد ما لفتهم في ورقه جورنال ورمتهم قدامي في صندوق الزباله ..
سعد	(ضاحكاً) ياللا خللي القلط تتهني ..
ناهد	وهي القلط بتاكل كوسه ..
سعد	متهيألي صعب ..
ناهد	والله كان هاين علي آخدهم ..
سعد	من صندوق الزباله ..
ناهد	ليه لأ .. ماهي متكومه في ورقه جورنال مع القشر ..
سعد	ياوليه حرام عليكي ..
ناهد	وموش حرام اللي هي عملته ..
سعد	ما علينا .. ياللا ناكل ..
ناهد	(وهي تتحدث في عمق) اصبر شويه علشان جاتلي فكره في غدوه ما تخطرش على بالك ..

غير اننا نغمس بالملح ..	سعد
غير كده خالص ..	ناهد
غير كده ازاي ؟ ..	سعد
شوف ياسعد ..	ناهد
افندم ..	سعد
(في لهجه ترغيب) ايه رأيك لو أغديك النهارده كوسه ..	ناهد
(في دهشه) كوسه !! ..	سعد
آه كوسه ..	ناهد
(في ريبه) او عي يكون قصدك علي الكوسه اللي رمتها	سعد
عواطف في الزباله ..	
مانا باقولك انها ملفوفه في ورقه جورنال لوحدها ..	ناهد
اعقلي ..	سعد
والله عاقله علي الآخر وبحسبها صح ..	ناهد
الصح اننا ناكل من صندوق الزباله ؟ .. هو صحيح الجوع	سعد
كافر .. بس موش للدرجه دى ..	
(في محاوله اقناع) مشيها ياسيدى اني حامل وباتوحم ..	ناهد
فيه وحم في الدنيا يدخل في الرمرمه ؟ ..	سعد
ساعات الرمرمه تكون أرحم من الموت البطئ ..	ناهد
وساعات الموت البطئ يكون أرحم من قلة الكرامه ..	سعد

ناهد

(في تحدى لما يقول) حتي لو وصل انه يبقي فضيحه..

سعد

(في تحد هو الآخر) الموت عمره ما كان فضيحه ..

ناهد

لأ ممكن يبقي فضيحه .. احنا لو حد فينا طب دلوقت موش هاتبقي فضيحه ؟ .. فضيحه و ستين فضيحه .. لانه لا معانا حق كفن ولا حق حانوتي .. ولا حق خارجه .. ولا حتى حق بطاريه ولا كارت نبلغ بيهم أهلنا باللي حصل من أساسه .. هانفضل محبوسين جوه الشقه لحد ما نعفن والناس تشم الريحه ويطلبوا البوليس وتبقي جرسه (ثم في قوه أكبر) أخرج ياسعد .. اخرج هات الكوسه من بره وبلاش فضايح .. أخرج ياسعد .. أخرج ..

سعد

(بعد لحظه تفكير) هو الصندوق فين ؟ ..

ناهد

علي باب شقه عواطف ..

سعد

هاجبيه .. هاجبيه ياناها .. هاجبيه وباعترفلك اني كنت أعمي فعلاً عن الحقيقه .. هاجبيه عشان نعيش .. علشان البوليس لو جه وفتح علينا مانكونش في وضع كده ولا كده ويضطروا يغطونا بملايات زى اللي بيضططوهم حرائين في الشقق المفروشه .. هاجبيه ..

(يخرج سعد من الشقه ويتجه في حذر نحو صندوق القمامه ويبحث فيه عن تلك اللغافه .. في هذه اللحظه يظهر جاره

"كرم" وهو يصعد السلم ويبيده جريده يوميه ويشاهد ما يحدث دون ان ينتبه سعد اليه الذى ينتهي به الأمر أخيراً بأخذه الصندوق كله خوفاً من خروج عواطف وها هو يستدير ليصطدم بكرم الذى ينظر له في ابتسامه ودهشه) ..

(بصوت منخفض) أستاذ كرم !! .. سعد

إزيك ياأستاذ سعد .. كرم

(وهو لا يعرف ماذا يفعل حيال هذا الموقف) أنا كويس .. سعد

كويس عالأخر ٠٠

يارب علي طول .. (ثم وهو يشير له بالمضى) اتفضل كرم

حضرتك .. اتفضل ..

(في قلق) بعد اذنك .. سعد

(يمضى كرم الي الطابق الأعلى مع متابعه سعد له ونظراته الى باب شقه عواطف المغلق .. ليتجه أخيراً الي باب شقته ليدخل ويغلق الباب خلفه) ..

(وهي تلاحظ الحاله التي عليها سعد) ايه ياسعد .. مالك ؟ .. ناهد

عملت بنصحتك .. سعد

أنا قتلتك هات الصندوق .. ناهد

اللي حصل .. ماعرفتش اوصل للفه اللي قتلي عليها .. قلت سعد

اجيبهولك كله علشان تدورى فيه براحتك ..

- ناهد (وهي تتقدم نحو الصندوق) ثواني وهاطلعتها ..
- سعد مابقيتش دى المشكله ياست هانم .. المشكله ان الأستاذ كرم جارنا قابلني وانا جاى بيه علي هنا ..
- ناهد (وهي تصفع صدرها) يادى الفضيحه ..
- سعد صدقتي بقي ان الموت أرحم من قلة الكرامه ..
- ناهد (في حده) وبعدين ..
- سعد ولا قبلين .. الراجل شافني واللي كان كان ..
- ناهد كنت قوله انا بادور علي حاجه ضاعت مني ..
- سعد (في غيظ) ضاعت مني في صندوق ست عواطف صاحبة البيت !! ده كلام ؟ ..
- ناهد موش عارفه اقولك ايه ..
- سعد لا تقولي ولا تعيدى .. الصندوق عندك ايه اعلمي اللي انتي عاوزاه بس في الآخر انتي اللي هاترجعيه مكانه ..
- ناهد حاضر .. (ثم تقترب من الصندوق وتقوم بالبحث فيه وتخرج بعض القمامه قبل ان تحصل علي اللفه التي بها الكوسه وبعد ان تجدها تهلل فرحاً) أهه .. وبلفتها ما إتفتحتش ..
- سعد (في تهكم) والزباله اللي حواليتها دى كلها .. ماصدتش نفسك؟
- ناهد ياخويا .. مالحنأ كده كده هانغسلها قبل ما تتسلق ..
- سعد (في أسف) أنا موش عارف بأى وش أقابل الراجل ده تاني ..

ناهد (وهي تزيل ورق الجرائد) الأستاذ كرم للأمانه من ساعه ما

سكن هنا وهو في حاله .. وكفايه اللي هو فيه بعد مراته
ماطلبت الطلاق منه بحجه ان السكن ده موش علي هواها ..
(وفي تهكم) كانت عاوزه تسكن في الزمالك ولا المهندسين
بنت الباشا .. (ويبدو انها توصلت الي غايتها) .. أهه
ياسيدى.. الكوسه بحالها ونضيفه زى الفل ومافيهاش جنس
حاجه .. (فجأة تجحظ عيناها) .. ياخير اسوح ومهيب !! ..

سعد (وقد لاحظ ذلك) .. فيه ايه ؟ ..

ناهد نصيبه ياسعد .. نصيبه ..

سعد الكوسه دودت ولا لقيتي فيها صرصار ؟ ..

ناهد صرصار ايه .. ده تعبان ياسعد .. تعبان ..

سعد تعبان ؟ ..

ناهد (وهي تخرج شيئاً من بين الكوسه) .. تصور !! .. كيس

فلوس الست عواطف محطوط وسط الكوسه ..

سعد (وهو يصفع خديه بكتا يديه علامه علي وقع النصيبه التي

يشعر بها) .. محطوط وسط الكوسه .. غطيني ياناهد

وصوتي.. غطيني ..

ناهد استنتي بس .. ياما انت كريم يارب .. ياما انت كريم ..

سعد كريم يارب إنك لقيتي كيس فلوسها ؟ .. (ويلطم خديه) ..

أحيه.. أحيه .. أحيه ..	
أهدى ياسعد موش كده ..	ناهد
وصلت اننا نبقى رمراميه وحراميه في يوم واحد .. أعمل ايه	سعد
ياربي .. أعمل ايه ؟ ..	
هو احنا كنا دخلنا شقتها وسرقناه ..	ناهد
لأ .. دخلنا جوه صندوق زبالتها وقشطناه ..	سعد
حد كان قالها تنسى وتحط كيس فلوسها وسط الزباله .. والله انا	ناهد
لو كنت خدت بالي كنت نبهتها ..	
والعمل ؟ ..	سعد
موش عارفه ..	ناهد
اتفضلي ياهانم وديه ..	سعد
أودى إيه ؟ ..	ناهد
كيس الفلوس .. هو احنا بنتكلم عن حاجه تاني ؟ ..	سعد
وده ينفع ..	ناهد
(في تعجب) طبعاً ينفع .. هو احنا ناكل أكلها ونسرق قرشها !!	سعد
طيب ايه رأيك بقي ان لا الأكل ولا الفلوس دول بتوعها ..	ناهد
ما تقول بالمره ان الصندوق ده كمان موش بتاعها ..	سعد
(معارضه) لا موش بتاعها .. ده بتاع صاحب النصيب .. سوا	ناهد
بقي كان زبال .. قطه .. عيل بيلعب في أى حاجه ..	

سعد طالما البني آدم عارف صاحب الشئ وخده يبقي حكمه حكم الحرامي ..

ناهد (وهي تفتح الكيس في سعادته) ده ايه الهنا ده كله ياناس .. ورقه بمتين وورقه بميه وورقه بخمسين وتلات عشرات كمان .. شفت الرزق ياسعد .. شفت .. ربنا عشان عالم بحالنا شوف بعنلنا ايه ..

سعد (مصحاً لها) ودانا لإيه .. ده امتحان ياست هانم ياننجح فيه يانسقط ونبقي حراميه احنا الاتنين ..

ناهد (في نبره لتهدئه الموقف) .. إفهمني ياسعد .. لا انا ولا انت كنا حراميه ولا هانكون حراميه في يوم من الايام .. وده موش هایتعارض مع اننا مانرجعش الكيس ولا نشغل بالنا برجوعه ..

سعد إيه .. هاننزل نفرق اللي فيه علي الغلابه في الشارع !!

ناهد لأ .. احنا هانستلفهم ..

سعد من مين ؟ ..

ناهد من الست عواطف ..

سعد يعني هانقولها ..

ناهد نقولها ايه بس .. وهي ترضى تسلفنا حتي نص جنينه؟ ..

سعد امال هاتستلفيهم ازاي ؟ ..

ناهد احنا هاناخذهم من غير ما نقولها ..

- سعد** سلف بالاكراه يعني ..
- ناهد** واول ما يجيلنا فلوس نبقى نردهم .. وطالما ان ده في نيتنا يبقى لا هو عيب ولا حرام ..
- سعد** لأ حرام ..
- ناهد** حرام ليه بس ؟ ..
- سعد** افرضى انها محتاجهم لظرف مهم وعامله حسابها عليهم ..
- ناهد** (في معارضه) واحده عندها بالألوفات هاتعمل حسابها علي شويه فكه ؟ ..
- سعد** حقها والفلوس دى لازم ترجع حالاً .. موش جايز لما تعرف امانتنا تقوم تصهين شويه علي الإيجار المتأخر لحد ما الشيك يوصل براحته ..
- ناهد** عشم إبليس ..
- سعد** حتي لو ماصهينتش موش مهم .. المهم اننا بينا وبين نفسنا نكون محترمين ..
- ناهد** (بعد لحظة صمت) لو هو افقك في انهم يرجعوا .. تقدر تقوللي يرجعوا ازاي ؟ ..
- سعد** تديهم لها في ايدها ..
- ناهد** (مباغتة) واقولها لقيتهم فين !! .. اقولها لقيتهم وانا بفتش في صندوق زبالتها علي حاجه ناكلها ونتقوت بيها ؟ ..

- سعد** أنا ماقولتش كده ..
- ناهد** (متجاوزة مايقول) قوللي اقولها ايه ؟ ..
- سعد** (بعد لحظه تفكير) أحسن حاجه تحطيمهم في كيسهم وترجعهم صندوق الزباله ..
- ناهد** ده أنيل .. لان الزبال هاييجي في أى وقت يفضيه ويبقي المبلغ لا نابها ولا نابنا ولا نابيه .. آخرتها هايترمى فى مقلب الزباله ..
- سعد** (سريعاً) أنا جاتلي فكره .. ايه رأيك تقوليلها انك لقيتي الكيس مرمرى قدام باب شقتها ..
- ناهد** مش هاتصدق .. لانها مش هاتعترف أبدا انها نسيت وحطيته مع الكوسه اللي رمتها وكل اللي هاييجي في بالها اني انا سرقتها وانا قاعده معاها .. فكر يأستاذ .. فكر ..
- سعد** مشكله فعلاً ..
- ناهد** (وهي ترفع يدها بطريقه الاستئذان) عندى حل وسط للمسأله .. ممكن أقوله ..
- سعد** اتفضل ..
- ناهد** أولاً ناخذ من الكيس الورقه اللي بميت جنيه ..
- سعد** (في حلق) .. مصره علي السرقة برضه !! ..
- ناهد** موش سرقة دول سلف زى ما قتللك وهايرجعوا يعني هايرجعوا .. (ومقاطعه قبل ان يتحدث) .. أما من ناحيه

- الكيس باللي فيه فهأيتحط علي باب شقتها وأدوس الجرس
وجرى علي هنا قبل ما تفتح وتلقاني ..
- خيالك خصيب زى اللي بيكتبوا الأفلام .. **سعد**
- وانا اقل منهم .. المهم اني اضرب عصفورين بحجر .. من **ناهد**
- ناحيه ارجعلها الكيس .. ومن ناحيه تانيه بيبقي معانا قرش لحد
الشيك ما ييجي .. بصراحه ياسعد انا عاوزه اشترى كارت
علشان اطمن علي العيال ..
- (في سخرية) وبالمرة تشتري حاجه تاكليها .. **سعد**
- حاجه ناكلها احنا الاثنين .. احنا قربنا نقع من طولنا .. **ناهد**
- (بعد لحظة تفكير) .. أقولك علي حاجه تصدمك .. **سعد**
- أنا ناقصه صدمات .. **ناهد**
- سؤال الأول .. سين هل انتي الوحيده اللي دخلتلها النهارده ؟ .. **سعد**
- (في حماس) جيم .. آه محدش دخل غيرى .. **ناهد**
- خدى الصدمه بقي .. طالما ان حضرتك الوحيده اللي دخلتلها **سعد**
- يبقي أكيد هاتشك انك سرقتيه ولما راجعتي نفسك قلتي
ترجعها بالطريقه العبيطه اللي قلتي عليها .. ايه رأى السياهه؟
- (في غيظ) .. مافيش فايده .. ربنا خلقتك علشان تنكد علي **ناهد**
- وتقل فرحتي .. أنا خلاص زهقت من الحكايه دى وسبتهالك ..
- سبتيلي ايه .. سبتيلي كارثة .. **سعد**

- ناهد** عندك الكيس والفلوس وصندوق الزبالة .. اتفضل اتصرف فيهم باللي يحلاك ..
- سعد** هو ده الرأى الأخير ؟ ..
- ناهد** ياخي عماله اجيبهالك يمين شمال .. وانت موش مريحك حاجه .. أعمل ايه تاني .. موش كفايه الموت ...
- سعد** (مقاطعاً سريعاً) البطئ اللي احنا فيه .. ايه رأيك ندفع الفرق ونشوف موت أسرع ..
- ناهد** (في ضيق) الله يخليك ياسعد .. انا قلتلك الحاجه عندك أهه واتصرف فيها زى مانت علوز .. انا عن نفسى موش هاعمل جنس حاجه ..
- سعد** شويه شويه هاتقوليلي روح انت وديهم ..
- ناهد** موش ده اللي انت شايفه ..
- سعد** وابقي شريك معاكي في الجريمه ..
- ناهد** شريك طبعاً .. هي الست وجوزها ايه .. موش واحد ..
- سعد** في ده لأ .. انا ماليش دخل بالموضوع ده نهائى ..
- ناهد** (في مواجهه) متأكد ..
- سعد** إلا متأكد .. حد يروح للعفريت برجليه ويقوله كلني!!! ..
- ناهد** عظيم .. يبقي جنابك تسكت بقي وتسيبني أنفذ اللي في دماغي ..
- (في تدارك) .. بالمناسبه .. احنا ناسين حاجه مهمه ..

سعد	اللي هي ..
ناهد	الراجل اللي قابلته علي السلم .. الأستاذ كرم جارنا ..
سعد	ماله ؟ ..
ناهد	موش شافك وانت شايل صندوق الزباله وداخل بيه علي هنا ..
سعد	حصل ..
ناهد	تسمحلي أردلك الصدمه بقى بصدمه أقوى منها ومن العيار
	اللي هو ..
سعد	(في ترحاب) ٠٠ ردى ..
ناهد	لو افترضنا ان الست عواطف فاقت لروحها وخمنت انها تكون حطت كيس فلوسها بالغلط وسط الزباله وخرجت تدور فيها وما لاقتش الصندوق من أصله .. طبعاً هاتعمل هوليله والجيران هاتسمع ومنهم الاستاذ كرم .. وده شئ طبيعي .. ما فكرتش حضرتك انه هايقولها انه شافك وانت داخل بيه علي هنا .. (في ابتسامه) رد يابطل ..
سعد	أنا بطل ..
ناهد	ساعات ..
سعد	ساعات .. (يفكر لبعض الوقت وقد أسقط في يده) موش عارف أرد بايه ..
ناهد	شفت ان رأيي أنا هو اللي صايب ..

- سعد** في اننا نستلف من الكيس زى ما بتقولي ..
- ناهد** (في خيلاء) .. لأ .. الكيس ده باللي فيه كله موش هايرجع خالص غير لما يبجي الوقت المناسب ..
- سعد** ولو الاستاذ كرم قالها انه شافني وانا واخد الصندوق هادافع ساعتها عن نفسى واقول ايه ؟ أقول اني كنت واخده عشان ادور فيه علي حاجه آكلها زى القطط ما بتعمل !! ..
- ناهد** وانا برضه هارضى بكده ..
- سعد** امال هاترضى بايه ؟ ..
- ناهد** (وهي تلعب بمشاعره) فكر يمكن تلاقي رد ثاني ..
- سعد** كله منك .. انتي السبب في كل اللي بيحصل .. انتي السبب ..
- ناهد** انا السبب برضه ..
- سعد** أيوه .. موش انتي اللي حكمتى علينا بالموقف المنيل ده اللي احنا فيه ..
- ناهد** السبب انت عارفه كويس يااستاذ ..
- سعد** (محذراً لها) او عي تكلميني ثاني عن الموت البطئ اللي انتي ماسكهولي ده .. او عي ..
- ناهد** (في تجاوز لتحذيره) عموماً .. انت جه في كلامك طرف تالت مهم ممكن نشيله الليلة و يحلنا المشكله ..
- سعد** مين الطرف ده ؟ ..

ناهد	اللي جبت سيرتهم من شويه ..
سعد	مين دول اللي انا جبت سيرتهم ؟ ..
ناهد	القطط ..
سعد	القطط؟ ..
ناهد	ايوه القطط ..
سعد	القطط هي اللي خدت الكيس ؟ ..
ناهد	لأ هي اللي قلبت صندوق الزباله ..
سعد	كويس لحد هنا .. وبعدين ؟ ..
ناهد	ولا قبلين .. حضرتك لما سمعت الصندوق وهو بيتقلب اتخضيت وخرجت جرى لقيت القطط قالباه ومبهله الدنيا .. طلع الاستاذ كرم لقاك ماسكه بعد ما لميت الزباله اللي كانت جواه وموش عارف تحطه فين بعيد عن القطط .. طلع هو على شقيقته .. و إنت رجعت تاني معزز مكرم مكانه .. وبكده تقطع لسان اى حد يقول عليك انك بتاكل من الزباله ..
سعد	فكره موش بطالة ٠٠ ياللا حتى كل حاجه زى ما كانت واطلع أخرجه
ناهد	(وهي تعبث في الكيس) استني لما اخد الميه اللي قلتك عليهم
سعد	تاني هاتأخديهم ..
ناهد	موش انا اللي هاأخدهم ياخي ..

سعد أمال مين ؟ ..

ناهد القلط .. وكمان هاتخذ الكوسه وتقطع الجورنال .. وده يؤكد لعواطف ان القلط هي اللي عملتها ..

سعد انا موافق تاخدى الكوسه .. لكن موش موافق علي حكاية الميه اللي عاوزه تستلفيهم .. فكرى شويه واختارى بين رضا ربنا وبين غضبه علينا .. فكرى ياناهد واختارى .. فكرى ..

ناهد (بعد لحظه تفكير) المسأله موش محتاجه تفكير .. (ثم تضع النقود داخل الكيس وتضعه بالصندوق) .. سامحني معلش .. البني آدم قدام ظروفه ساعات بيضعف .. لكن لو فكر شويه يقتنع بان الكوسه المره أحلي مليون مره من الشهد لوجه من حرام .. قوم ياسعد ودى الصندوق قدام شقتها قبل ما تتكشف الحكايه .. قوم.

(ينهض سعد ويحمل الصندوق وفي اللحظة التي يتجه فيها نحو الباب تفتح عواطف العجوز باب شقتها وهي تكشر عن أنيابها غضباً وثوره مع إنسياب موسيقي تشبه موسيقي ظهور الفك المفترس .. وها هي تبحث هنا وهناك عن شئ ما في لهفه شديد ويبدو انها قد يأست من وجوده أمامها ويلاحظ انها تبحث بين ملابسها أيضاً بين الحين والآخر) ..

عواطف (بصوت هادر) يا عالم ياللي هنا .. يابني آدمين ياللي ساكنين

في المخروب ده معايا ..

(ومع ما يحدث بالخارج من هياج لعواطف ها هو سعد
يتوقف مكانه مرتجفاً من هول تلك المفاجأة .. أما ناهد فهي
تلطم خديها ووجهها خوفاً ورعباً من هذا الموقف وتبعاياته) ..

(وهو يتجه بالصندوق نحو الغرفة) .. افتحيلها بسرعه .. سعد

(التي تستوقفه) نعم يا اخويا !! ... افتحلها انت انا داخله استخبي ناهد

(في توسل اليها) خليكي جدعه وافتحي انتو ستات زى بعض.. سعد

(وهي تشير نحو الخارج) دى ستات دى .. ده مخبر .. انت ناهد

عاوزني اكشف علي رجاله ؟ ..

(وهي تطرق بيدها علي باب شقه سعد) افتحي ياناها .. عواطف

افتحي انا عواطف .. افتحي ..

أهي بعضمه لسانها حددت هي عايزه مين .. بعد اذنك.. سعد

(ويتجه سعد مسرعاً نحو الغرفة وهو يحمل صندوق القمامه

مع متابعه من ناهد المرتبكه تماماً) ..

(وهي تتجه لفتح الباب) أسترها يارب .. ده موش بعيد أبداً ناهد

تطردنا في جرايرها .. استر ..

(وقد فتحت لها ناهد الباب) .. ايه ياناها .. انتي موش عواطف

سامعاني ولا ايه ؟ ..

لا سمعاكي .. لا موش سامعاكي .. أنا .. أنا اصلي كنت في ناهد

المطبخ وصوت الطبخ كان عالي ..

عواطف (وهي تدخل متجاوزة عما سمعت) شفتي اللي حصل..

ناهد خير ياست عواطف ؟ ..

عواطف كيس الفلوس بتاعي ..

ناهد ماله .. ماله كيس الفلوس ..

عواطف (وهي تجلس علي الأريكة) اتسرق بكل اللي فيه ..

ناهد ياساتر .. معقول ؟ ..

عواطف اللي حصل .. هاموت وأعرف مين غريمي اللي سرقه عشان

أكله بسناني ..

ناهد (جانباً في تهكم) نحمد ربنا انهم موش موجودين ..

عواطف بتقولي ايه ..

ناهد بقول هو الكيس ده كان فيه كتير ؟ ..

عواطف كتير .. (ثم تلطم وجهها) .. يالهُوى يالهُوى .. يالهُوى إلا

كتير .. ده فيه كل اللي حيلتي .. فلوسى ودهبي .. والكمبيالات

اللي واخداها علي السكان الرمم اللي مايدفعوش الإيجار .. ده

غير كارت البنك اللي باسحب بيه المعاش وحجه البيت

والأرض اللي وارثاها عن المرحوم من بعد مامات .. آلا كتير.

ناهد (جانباً) كيس ده ولا ضلفه دولاب !! ..

عواطف بتقولي ايه ..

- ناهد** باقول ده نصيبه سوده وواجب علي أولول معاكي (وهي تستعد
باللطم علي خديها) .. ياللا ..
- عواطف** (وهي تولول) .. أحيه ولا بيه واللي سرقهم استقصدني أحيه
ليه .. (أمره ناهد) .. قولي ..
- ناهد** (وهي تجاملها في اللطم) .. أحيه ولا بيه واللي سرقهم
استقصدني أنا ليه .. أحيه ..
- عواطف** (وهي تنظر الي ما تفعله ناهد في دهشه) .. إيه اللي بتعكيه
ده ياوليه .. مالك .. هو انا اللي اتسرقت ولا انتي .. مش
تميزى في تعديك ؟ ..
- ناهد** (وهي تزيد من تمثيلها) .. أنا أصلي مخنوقه ياست عواطف
من اللي حصل .. مخنوقه ..
- عواطف** وتتخني ليه .. ماانا باقولك هما ضاعوا منك ولا مني .
- ناهد** منك طبعاً .. بس احنا جيران .. والجار للجار زى ما بيقولوا ..
واللي يصيبه يصيبني ..
- عواطف** (بطريقه مفاجئه) .. قوليلي ..
- ناهد** نعم ..
- عواطف** انت مش كنتي قاعده معايا وانا باقشر الكوسه ..
- ناهد** (علي الفور) آه .. لأ ..
- عواطف** لأ ولا آه .. حددى ..

- ناهد** آه كنت قاعده ..
- عواطف** موش كيس الفلوس كان محطوط جانبي علي الكنبه ..
- ناهد** جايز .. تقريباً كان محطوط ..
- عواطف** لأ .. موش تقريباً ولا جايز .. ده كان محطوط وشيلته كام مره
- وحطيته قدامك ..
- ناهد** يبقي كان محطوط ..
- عواطف** كويس انك قولتيها .. تفتكري مين اللي شاله ..
- ناهد** قصدك اللي سرقه بقي عشان الكلام يبقي واضح ..
- عواطف** موش هاقول كده .. وهامشيها اللي شاله ..
- ناهد** يعلم ربنا اذا حد كان قاصد يشيله ولا هو اللي جاله ..
- عواطف** موش فاهمه ..
- ناهد** موش احتمال يكون وقع في الشارع وانتني بتنفضي ملاية
- الكنبه مثلاً بعد تفشير الكوسه ..
- عواطف** (في حده) مانفضتش ..
- ناهد** أو احتمال يكون اتم مع القشر واترمي في صندوق الزباله ..
- عواطف** تعرفي انه ممكن ..
- ناهد** شفتي بقي .. الواحد يظن في أى حاجه غير ان ظنه يروح عدل
- لبني آدم ..
- عواطف** (وهي تنهض) .. نمشي دى كمان واقوم أدور عليه في

الزباله جايـز اللـي خـده يـكون اـتكسـف عـلي دـمه وـقال اـرجعـه

لـصاحبـته و يـبقـى عـمـل مـعـرف فـيـا و فـى رـوحـه

(وها هي تخرج من شقة سعد وتتجه نحو شقتها وتلاحظ

عدم وجود الصندوق فتبـدى دهـشـتها) .. الله هو الصندوق

مكانه جوه ولا بره .. أشوف يمكن يكون ركبـله عـجل .. (تفتح

باب شقتها لتدخلها وتغلق الباب خلفها) ..

ناهد (التي اطمئنت لما حدث من عواطف تتجه نحو باب الغرفة

ليفاجأها سعد بخروجه) .. سمعت ياسعد اللـي قالـته الـوليـه ..

سعد (وهو يهـز رأسـه بالـايـجاب) .. سمعت كل كلمه وحرف حرف..

ده ولا اللـي تـكون سمعت اللـي اـحـنا بـنـقـولـه ..

ناهد وهاتنتصرف ازاي ؟ ..

سعد فيها ولا في القـتـيل اللـي جـوه .. انا استاهل ضرب الجزمه

عشان

(فجأه عواطف تفتح باب شقتها وتتلفت يمينا ويسارا وأسفل

وأعلى السلم) ..

عواطف (بصوت مرتفع) .. صندوق الزباله لا هو جوه ولا بره ..

هايكون راح فين ؟ ..

ناهد (تلطم خديها) .. ما داهيه اللـي تـيجـي تـسألـنا عـنه ..

عواطف حتي صناديق الزباله كمان بقيت تتسرق .. سكان ايه الهم دول

اللي ربنا ابتلانى بيهم ..

سعد

كله كوم وحكاياه الكمبيالات والشيكات وحجج الأرض والبيت
اللي كانوا موجودين جوه الكيس كوم تاني .. ده القاضى لو خد
بكلامها أقله يدينا إعدام ..

عواطف

(وهي تنزل درجات السلم) أبص كده يمكن عيل يكون خده
معاه تحت وهو نازل ..

ناهد

(لسعد) عارف انا مرعوبه من ايه دلوقت ..

سعد

من انها تخطب علينا تاني ؟ ..

ناهد

لأ .. من انها تطلع تدور عليه فوق وتقابل الأستاذ كرم ويقولها
ان شافك وانت شايله ..

سعد

(بلهجه عتاب) .. صدقتيني لما بقولك ان الموت ستره للبني
آدم .. صدقتيني ..

ناهد

واذا كانت الستره موش عايزه تيجي نعمل ايه .. ننتحر

سعد

استغفر الله العظيم .. استغفر الله (ثم بلهجه هادئه) .. بصى
احنا احسن حاجه نعملها نعترفلها بالحقيقه ..

ناهد

انت اجننت .. دى كانت تعضنا ..

سعد

احنا كده معروضين معروضين لان جسم الجريمة جوه
شقتنا واستحاله إننا نقدر نخفيه ..

ناهد

أنا لا يمكن أو افك في اللي بتقوله ده لا يمكن ..

سعد ماهي لما تعرف اننا كنا بندور علي حاجه ناكلها أكرمنا من انها تقول علينا حراميه ..

ناهد وبعدهالك ياسعد .. انت عاوز تفرسني ..

سعد أنا عايز نخرج من الوضع المهبب ده بأحسن صوره ..

ناهد (في نبره حزينه وهي تنظر للسماء) حلها من عندك يارب ..

والله انا ما فكرت في كده عشان اعمل حاجه وحشه .. هو

الجوع اللي هياالي وياريطني ما سمعت كلامه .. ياريت ..

(عواطف تصعد السلم وتتجه في صلابه ناحيه باب سعد الذي

يتصنت لما يحدث بالخارج ويشعر بقدوم عواطف فيتجه

سريعاً نحو الغرفه فتستوقفه ناهد بيدها) ..

سعد ايه اللي بتعمليه ده ؟ ..

ناهد ماتسبنيش ياسعد وخليك معايا .. ماتسبنيش ..

سعد (وهو يتوقف عن دخول الغرفه) والله ما عارف مين اللي

مايسبش مين ..

عواطف (وهي تدق علي باب شقه سعد) .. أيوه ياناها .. افتحي انا

عايزاكي ..

ناهد (وهي تتجه نحو الباب لتفتحه) .. جايه ياست عواطف ..

ثانيه واحده .. (وتفتح الباب) ..

سعد جالك الموت ياتارك الصلاه ..

(عواطف التي تدخل وتفاجئ بوجود سعد أمامها والشرر

يتطاير من عينها) ..

عواطف كويس انك هنا يا أستاذ سعد .. ناهد حكيتلك علي اللي جوالي ..

سعد لأ أنا لسه داخل .. خير ؟ ..

عواطف كيس الفلوس بتاعي اتسرق وفيه أعز ما أملك ..

سعد (في دهشه) .. أعز ما تملكي !! ..

عواطف (مؤكده) .. أيوه .. حتي مراتك قالتلي شوفيه يكون في

صندوق الزبالة ..

سعد وده ايه اللي يوديه هناك ؟ ..

عواطف هي ظنها ان الكيس يكون أترمي فيه ..

سعد (يراجعها) .. بأعز ما تملكي ..

عواطف بأعز ما أملك .. دورت علي الصندوق عندى موش موجود ..

قدام باب الشقه موش موجود .. تحت موش موجود .. يكون

راح فين ؟ ..

ناهد تكون القطط جرجرته للشارع ..

عواطف وده كلام يدخل عقل برضه !! .. هي القطط تقدر تجر جر

صندوق زى ده بحاله ..

سعد (لناهد) .. خصوصاً وهو فيه أعز ما تملك وده وزنه أكيد

ماهواش بالساهل ..

- عواطف** كمان لا القطط ولا الكلاب حتي تقبل تشمشم عليه ولا تيجي
يمته
- سعد** ماغريهانش ..
- عواطف** يغرى مين ؟ .. ده معفن ..
- سعد** (بعد ان يمسك أنفه بأصابعه) .. حتي القطط والكلاب ليهم
نفس يا عالم .. (ثم لعواطف) .. طيب والعمل ايه دلوقتي
ياست عواطف ؟ ..
- عواطف** أبدأ .. مافيش غير اني أشوفه في الشارع اللي ورا يمكن
العيال تكون خدته تعمل بيه جون للزفت اللي بيلعبوها ..
- ناهد** احتمال برضه .. انزلي شوفيه ..
- عواطف** (وهي تعتدل نحو الغرفه) .. لا أنا هأبص عليه من شباك
علشان زى مانتتي عارفه شبابيكي مابتطلش علي شهر البيت .
- سعد** (وهو يتراقص خلف عواطف ولناهد بصوت تسمعه) .. ازى
الصحه .. ازى الحال ؟ ..
- ناهد** (في دهشه) انت بتعمل كده ليه ؟ ..
- سعد** بعمل كده ليه .. انتي جالك زهايمر مفاجئ ..
- عواطف** (لناهد في عدم معرفه) .. ايه الزهايمر ده ؟ ..
- سعد** (لعواطف) .. حاجه في الأصل بتيجي للبنى آدم واحده واحده ..
لكن النصيبه لو جتله فجأة ..

عواطف	موش فاهمه ..
سعد	(وهو يشير لناهد) .. هي فاهمه ..
عواطف	فاهمه ايه ؟ ..
سعد	فاهمه انها عيانه وعياها عارفه عنه كل حاجه ..
عواطف	(لسعد هامسه) .. لطف والعياذ بالله ..
سعد	(لعواطف) .. لطف ياباشا ..
عواطف	(وهي تلف بيدها حول رأسها) .. اللهم احفظنا واكفينا شر المستخبي ..
ناهد	(هامسه لسعد) .. انا موش عارفه انت بتعمل كده ليه .. هو تحت السرير ولا جنب السرير ..
سعد	(هامساً لناهد) .. هو لو كان تحت السرير ولا جوه الدولاب كان هايجيلي الهلع ده كله .. ده متسنتر وسط الأوضة بينهم الإثنين ..
ناهد	(وهي تتراقص أمام عواطف) ازى الصحه .. ازى الحال ..
سعد	(مع دهشه عواطف مما يحدث) .. صدقتيني ..
عواطف	(يبدو انها قد سمعت ما قاله لناهد) .. أصدق ايه في اللي بيحصل ده .. واياه حكاية تحت السرير وجوه الدولاب اللي بتقولهاها .. انت ماسك عليها حاجه ..
سعد	ماسك .. إلا ماسك .. ده انا ماسك وماسك وماسك ..

عواطف	(في تهكم) ياماشاء الله علي الشنابات ..
ناهد	(محذره لعواطف) أوعي مخك يحدود وتكوني فهمتي
	الموضوع غلط ..
سعد	(معترضاً علي ناهد) .. طب إيه رأيك بقي ان اللي فاهماه هو
	اللي هايخللص الليله ..
ناهد	وتيجي علي دماغي ..
سعد	اذا كانت جت علي أعز ما أملك أنا شخصياً .. موش هاتيحي
	علي دماغك .. عديها عديها ..
عواطف	(حسماً للأمر وهي تتجه نحو الغرفه) .. شوفوا انتوا الاتنين..
	انا بقي صاحبه البيت ده ويحقلي اني أعرف كل حاجه بتحصل
	جواه ..
سعد	(وهو يقف عند الباب ليمنعها) .. علي جثتي ..
ناهد	(لعواطف) عاجبك كده .. أهو حلف بالطلاق ..
عواطف	(بعدم تراجع) .. وليكن ..
ناهد	(لعواطف) وطلاق مني انا كمان مانتني داخله ..
عواطف	ياحلاوه ياولاد .. يبقي البيت بيتي وماتحكمش في شبابيك بيتي.
سعد	بيتك الشقه التانيه ياست عواطف ..
عواطف	لأ .. كل شقه في البيت ده شقتي ..
سعد	في أنهي قانون ؟ ..

- عواطف** في قانون ازی الصحه یاسبع البرمبه .. في قانون الایجار اللي صاربین علیه عوافي یاضلالیه ..
- سعد** احنا موش صاربین .. احنا متعثرین ..
- عواطف** کلمني عربي زی ما باکلمک ..
- ناهد** وهو بیکلمک فرنساوی ..
- عواطف** (وهي تحاول السيطرة علي نفسها من الغضب) .. منظرها کده هاندخل في الغلط والكلام هایجیب کلام ..
- سعد** (لعواطف مهدداً) .. وأنا لا أسمح بأی کلمه زیاده تنقل مهمما حصل .. اتفضلي المحاکم قدامک وروحي ارفعي القضیه اللي تحلالک ..
- عواطف** هارفع یاخویا .. وهاطلب کمان رفع الإیجار ..
- ناهد** وترفعی الإیجار لیه ان شاء الله !! ..
- عواطف** علشان اللي تحت السریر واللي جوه الدولاب .. والعالم اللي من ورا ضهری بتدخلوهم وتقوهم ..
- سعد** (لعواطف) .. واذا قلت لك ان اللي بتقولی علیهم دول مالهومش وجود غیر فی دماغک ..
- عواطف** (تصرخ) .. یاخرا بی .. وکمان قتلنوا قتلا فی بیتي یا ظلمه ..
- (ثم وهي تنظر الي ناهد) .. کله منک یاقادره .. انتي السبب ..
- سعد** (لعواطف) .. أخرسی واحترمی نفسك .. أنا مراتي أشرف

واحدہ فی دنیا ..

عواطف (لسعد) .. قول اللی تقوله یاعم الحر .. مالحنّا خلاص فہمنا
القولہ واللی کان کان ..

ناہد إخص علیکی یاست عواطف بقی بعد العشرہ دی کلہا تغلّطی
فینا الغلطہ ..

عواطف (فی دہشہ) .. شوف یاخویا ہایرکبونی الغلط ازای !! ..
ست استغفر اللہ وراجل أعوذ باللہ .. وانا العیبہ ماطلعتش منی
یاحول اللہ

سعد (وهو یحافظ علی عدم الانفعال) .. الخلاصہ یاست یاأصیلہ
یاکاملہ .. کل اللی ممکن اقولہولک وبکل أدب .. امشی اطلعی
برہ .. (ثم أمراً فی عنف) .. إمشی

عواطف أمشی دہ ایہ .. والصندوق ..
ناہد مالہ الصندوق ..

عواطف (فی تعجب) .. مالہ !! .. مش انتوا الجیران الوحیدین اللی
معايا فی البسطہ .. ایہ ماسألکومش .. مافتشکومش .. فلوسی
یعنی ودہبی وحجی یروحوا کدہ وماخذش معاکم ولا أدى ..
ناہد بالدبش اللی بتحدفہ ..

عواطف صاحب الحق دایماً صوتہ عالی ..
سعد (فی تہکم) .. وهو دہ السبب اللی بیضیع بیہ حقہ .. روجی

ربنا يهديكي .. روجي اسألني في حته تانيه.. روجي ..	
هو انا هاسكت .. ده هاسأل اللي هنا واللي هناك واللي تحت واللي فوق ..	عواطف
(مقاطعاً) .. لأ .. بلاش اللي فوق ..	سعد
اشمعني اللي فوق !! ..	عواطف
لأن لما تعلي صوتك عنده هايدبدب علينا ..	سعد
يدبدب يججل .. أعمل اللي انا عاوزاه ..	عواطف
(في لهجه متعقله) .. سعد مايقصدش كده .. ده بيهزر .. هو بس زى ماتقولي خايف عليكي حبتين ..	ناهد
(لناهد) .. أنا خايف عليها ..	سعد
(تغمز لسعد) .. خايف ومتأكد .. هي ست عواطف برضه موش في مقام والدتك ..	ناهد
(في دهشه لناهد) .. موش فاهم !! ..	سعد
(تزيد من همسها له) .. إهي .. موش فاهم انها لما تطلع فوق.. قلبها يتعب وتشتكي منه اكثر ماهي تعبانه	ناهد
(وقد فهم) .. كده وصلت .. ياه ده انا كنت هارتكب جريمه جامده لو كنت سبتها تطلع .. (ثم لعواطف في تودد) .. ده كله إلا القلب ياست عواطف .. اوعي تطلعي ..	سعد
(في حده) .. مين الغبي اللي قالكم ان عندى القلب ..	عواطف

سعد	(لعواطف) .. وشك • شوفيه في المرايه كده لونه إيه
عواطف	لونه إيه ؟ ..
ناهد	أحمر ..
عواطف	أحمر !! ..
سعد	لأ .. أصفر ..
عواطف	أصفر !! ..
ناهد	لأ لأ .. ياساتر يارب ياساتر .. ده أزرق علي الآخر وقرب يسود ..
عواطف	(محذره لناهد) .. بقولك ايه انتي وجوزك .. أنا موش عاوزه مسخره ..
سعد	ما عاش اللي يمسخرك .. بس انتي فعلاً مريضه بالقلب .. وأنا عندى خبره كبيره بالمرض ده .. أصل الوالده الله يرحمها في آخر أيامها كانت بتمر بنفس الحاله اللي انتي فيها بالمللي • •
عواطف	(رافضه) الكلام ده موش داخل دماغي ..
سعد	والله احنا بنخلص ضميرنا والموضوع يرجعك ..
عواطف	(لحظة صمت وتفكير) .. يعني الدكتور لما قاللي أكل مسلوق بس كان عشان كده .. علماً بإنني راичاله بوجع في بطني وقاللي ده من المصران ..
سعد	وانتي كنتي عاوزاه يفاجأك بالحقيقه وتطبي ساكته .. الحمد لله

انه خباها عنك لأن لسه مكتوبلك عمر ووقت تعيشيه ..

ناهد دكتور ابن حلال ..

عواطف (في نبرة ضعف وتوسل) .. احفيلي كده اني بجد عيانه ..

ناهد والله عيانه .. موش الدكتور قالك ان المصران تعبنا ..

عواطف أيوه قال ..

ناهد يبقى عندك القلب زى سعد ما بيقول ..

سعد (لعواطف) .. بلاش كده .. الدكتور موش قالك كلي مسلوق ..

عواطف أيوه قاللي كلي مسلوق ..

سعد وبالذات الكوسه ..

عواطف وبالذات الكوسه ..

سعد ليه بقي الكوسه .. لان الكوسه زى ما كل الناس عارفه انها

مفيده للقلب وبتقويه ..

عواطف (توافقه) وأهالينا زمان قالوا كده ..

سعد أهه ماجبتش حاجه من عندى ..

عواطف (يبدو انها قد صدقت وفي إنكسار) .. ممكن ومن غير ما

نقلب في اللي فات .. ممكن تسامحوني ..

ناهد إلا نسامحك .. هو ده وقت برضه الناس ماتسامحش فيه .. ده

حتي عدم مسامحة العيان حرام ..

عواطف (في ضعف) .. كتر خيرك .. ممكن أطلب منك طلب ثاني ..

ناهد انتي تومري ..

عواطف (لناهد) .. إيه رأيك تطلعي انتي فوق تسألني علي الصندوق
وانا انزل تحت اسأل عليه ..

سعد (لعواطف) .. غلط .. احنا قولنا انك عيانه والحركه ليكي مو
كويسه ..

عواطف (لسعد) .. يعني انت اللي هاتنزل وهي اللي هاتطلع ..
سعد برضه غلط ..

عواطف كله غلط في غلط .. طيب قوللي نعمل ايه ؟ ..
سعد انا عن نفسي موش هانزل ..

عواطف وبعدين ..
سعد وهي كمان عن نفسها موش هاتطلع ..

عواطف ونسيب الصندوق يروح ..
سعد الصندوق ده بتاع مين ..

عواطف بتاعي ..
سعد يبقي مين اللي عليه انه يتصرف ؟ ..

عواطف (تصرخ عاليًا) .. يانهار اسود علي وعلي اللي ببجرالي .. انت
موش لسه قايل بعضمة لسانك اني عيانه والحركه لي موش
كويسه !! ..

سعد حصل ..

- عواطف** آمال عاوزني أدور عليه بنفسى إزاي ؟ ..
- سعد** أنا قتلتك تدورى عليه ..
- عواطف** أيوه قلت ..
- سعد** لأ ماقولتش .. انا باقول ان صاحب الشئ هو اللي عليه انه يتصرف وماجبتش سيرتك نهائى ..
- عواطف** (في حده) .. انت عاوز تجنني ياراجل انت !! ..
- ناهد** هدى نفسك ياست عواطف .. انتي عيانه ومش حمل الزعيق ..
- عواطف** (لناهدي في حده) .. سيبك من قصة العياده وارميها علي جنب .. أنا لو ده آخر ساعه في عمري هأزق وأهلل وأعمل ما بدالي .. فلوسى ياناس .. فلوسى وشيكاتي وكمبيالاتي وحجج البيت والارض وصيغتي وأماطاتي .. وانا دلوقت بقي يحقلي اني أصوت وألم الناس عليكم .. (ثم تركض نحو الخارج وتقف وسط الطريقه صارخه) .. ياخلق ياللي فوق .. ياخلق ياللي تحت .. يا عالم كلكم تعالوا احضروني .. غيثوني ياناس غيثوني
- سعد** (الذى يبدو عليه القلق ويخرج إليها) .. عيب الكلام ده ياست عواطف .. عيب ..
- عواطف** لأ موش عيب .. واقطع دراعي ان انتوا الاتنين اللي عاملينها. (ينزل كرم في هدوء وهو يحمل الجريده اليوميه بيده وتبدو عليه السعاده) ..
- سعد** (وقد رأى كرم فينسحب للداخل ولعواطف) .. عملناها

عملناها .. واخبطي راسك في الحيط .. (ثم يغلق الباب)	
(الذى اقترب من عواطف التي تنظر في غيظ لشقه سعد	كرم
المغلقة) .. مالك ياست عواطف .. منفعله كده ليه؟..	
(لكرم) .. أنا اتسرقت يأستاذ كرم .. إتسرقت .. إتسرقت ده	عواطف
ايه .. أنا اتشفطت ..	
هدى أعصابك شويه .. وكل حاجه هاتتحل ان شاء الله .	كرم
(وهي تمسك بيد كرم) .. بقي انت عرفت مين اللي شفطنى.	عواطف
(في دهشه وهو يدق علي باب سعد الذى يقف خلفه هو	كرم
وزوجته يستمعون الي ما يحدث بالخارج) .. إنشطى ازاي	
بس وانت موجوده قدامي .. ثواني قتلتك .. إهدى .. (ثم يقوم	
بالدق علي باب سعد) ..	
(الذى يفتح الباب أخيراً ولكرم) .. أيوه يأستاذ كرم فيه حاجه؟	سعد
طيب قول اتفضل الأول ..	كرم
(وهو ينظر الي ناهد كى تختفي للداخل وبعد أن تدخل تماماً)..	سعد
اتفضل الأول ..	
(كرم وهو يدخل ومشيراً لعواطف بالدخول) .. تعالي ياست	كرم
عواطف ..	
(في حده لكرم) انت هاتعزم علي الناس تدخل بيتي ؟	سعد
(مع دخول عواطف وجلسها علي الأريكة وهو ينظر	كرم

للمكان) .. روق .. آمال القطاقيط الحلوين فين ؟

سعد .. خدوا منك حاجه انت الثاني ..

كرم أنا برضه قلت كده .. أنا بأسأل عليهم ..

سعد سألت عليك العافيه .. أفندم ؟ ..

كرم (لسعد) ممكن نتكلم واحنا قاعدين ..

سعد (لكرم) .. ممكن إيه .. ماسعادتك بتعمل كل حاجه انت عايزها

كرم (وهو يتقدم ويجلس في ثقاه علي المقعد الخشبي ويضع

الجريده اليوميه علي المنضده بجانبه) .. شكراً لذوقك ..

سعد (يوجه حديثه لكرم) .. بالمناسبه .. الدكتور مانعنا هنا من

القهوه والشاي والحلبه والقرفه والسحلب والكركيديه وأى حاجه
تتشرب غير الميه .. أجييلك كبايه ؟ ..

كرم (ضاحكاً) .. الدكتور بتاعي برضه مانعنى عنها .. (وهو يشير

له بالجلوس) .. اتفضل أقعد ..

سعد (وهو يجلس أمامه علي المقعد الآخر) .. قعدنا ..

عواطف (لكرم) .. ماتخلص بقي ياسيدنا وقول اللى عندك ..

كرم (لعواطف) .. اللي عندى لو طلع صح هاتبقي أكبر مفاجأه

هاتسمعوها ..

سعد (الذى ينظر لكرم في تهكم) .. بالنسبه لي مالاظنش .. (ثم

وهو يشير نحو عواطف) .. جايز تكون بالنسبه لها آه ..

كرم (لسعد وهو يضحك) .. تراهني انها بالنسبه لك انت ودوناً

عن أى حد ثاني ..

سعد (لكرم بصوت منخفض لحد ما) .. بطل تعملي فيها هولمز

وقولها علي اللي شوفته ..

كرم (لسعد وبصوت منخفض أيضاً) .. موش الشوفان اللي في

بالك .. ده شوفان من نوع ثاني ..

عواطف (في ضيق وحنق) .. إيه الألباز اللي بتتكلما بيها دى ..

ماتفهموني الحكايه ..

سعد (لعواطف) .. لا ألباز ولا حكايات .. (ثم لكرم) .. اتفضل

قول اللي عايز تقوله .. محدش بيموت ناقص عمر ..

كرم (بطريقة لتغيير مجرى الحديث) .. قوللي ياأستاذ سعد.. هو

إسم جد حضرتك شحاته ولا الشحات ؟ ..

سعد (لكرم) .. الشحات للأسف ..

كرم (في سعادته بالغه) .. والله العظيم .. إتمنيت بالفعل يكون كده

سعد من غير ما تحلف هو كده .. و اللي شفته وانت طالع بيأكد كده

كرم وشغل حضرتك في شركه قابضه ولا في الحكومه ..

سعد كان في شركه قابضه للأرواح وده سبب النسايب اللي إحنا

فيها ..

كرم (في سعادته أكثر وأكثر) .. كملها بقي وقوللي انت عامل

عنوان موبايلك علي عنوان الشركه ولا علي عنوان البيت ؟

- سعد علي عنوان الشرکه .. ليه ؟ ..
- کرم (وهو في حاله من السعاده أكثر وأكثر) .. سؤال أخير یااستاذ سعد ..
- سعد اتفضل .. أدینا بنتمرن علي التحقیقات ..
- کرم انت ليه مابتدش علي تلفونك لما حد بیطلبك ؟ ..
- سعد موش لما يكون فيه تلفون بیرن من أساسه علشان اسمع ..
- البطاریه أصلها واقعه .. وللأسف البنك موش عایز یفتحلي
- إعتماد علشان أبعت للخارج أجیب غیرها (ثم في ضیق)
- خالص یااستاذ ..
- کرم (الذی ینتصب فجأه ویفتح ذراعیه) .. أستاذ سعد .. بسرعه بسرعه أدینی بوسه ..
- سعد (في ریه) .. نعم !! ..
- کرم (لسعد وهو مازال فاتحاً ذراعیه) .. نعم ایه .. ده انت لازم تديها لي یعنی هاتديها لي ..
- سعد عیب یاحضرة .. فيه ستات موجودین ..
- کرم یاأستاذ سعد یسعدنی ویشر فنی إني أبلغك ٠٠٠٠
- عواطف (مقاطعه في تهكم) .. إيه هایعینوه وکیل وزاره ٠٠!!
- کرم (لعواطف) .. أكثر ..
- عواطف (لکرم) .. وزیر ..

كرم	(لعواطف) .. أكثر أكثر ..
عواطف	(لكرم رافعة إصبع الإيهام) يبقي هايدوده المحليات .. الهبر فيها كده ..
كرم	(لعواطف) .. عملي ايه ياست عواطف لو جالك فجأه مليون جنيه ..
عواطف	(في دون تحمس) .. ماخدهومش .. يديهوملي بالفلولار بيس.. لكن بالمصرى نو ..
ناهد	(فجأه تخرج ناهد وهي بين الشك واليقين فيما كانت تسمع) (لعواطف) .. حتي اللي يجيالك من السما هاتلابطى فيه .. (ثم لكرم) .. هي ايه الحكايه بالظبط ياأستاذ كرم ؟ ..
كرم	(لناهد) .. جوز حضرتك يامدام .. الأستاذ سعد محمد الشحات
ناهد	(في قلق) .. ماله .. حصله حادثه ..
كرم	(في رفض وهو يحدث ناهد) .. أجمل حادثه في الدنيا.. وعقبال يارب ما ننولها ..
ناهد	هايرجعوه الشغل تاني ؟ ..
كرم	شغل ايه بقي .. ده راجل منتظره حالاً جايزه قيمتها مليون ..
ناهد	مليون ايه !! ..
كرم	مليون جنيه ..
سعد	قول تاني كده كام ؟ ..

كرم (وهو يمسك بالجريدة ويفتحها علي صفحه ما) .. موش ده
إسمك .. وده إسم شركتك اللي عامل عليها العنوان في العقد
بتاع موبايلك ..

سعد (وهو ينظر في الجريدة) .. هما بالظبط ..
كرم (وهو مازال ممسكاً بالجريدة لسعد) .. إقرا كمان الكلام اللي
تحت الجايزه ..

سعد (وهو يقرأ ويهتم) .. ولما علمت شركه المحمول مقدمة
الجائزة بأن صاحب الجائزه قد فقد وظيفته لظروف خارجه
عن إرادته فقد قرر السيد رئيس مجلس الإدارة تعيينه فوراً
ليصبح بذلك من أ حظ المحظوظين ..

كرم (لسعد) .. إيه رأيك بقي يأستاذ ..

سعد (لكرم) .. ماتجيب بوسه ..

كرم عشر بوسات ..

سعد خليه بعدين .. ممكن أطلب منك طلب صغير ..

كرم عينيه ..

سعد (لكرم) .. ثانيه واحده .. (ثم لعواطف) .. بقول إيه ياست

عواطف .. هو الكيس اللي ضاع منك في صندوق الزباله كان
فيه حوالي كام ؟ ..

عواطف (لسعد في تفحص) .. شوف انت بقي لما يكون فيه ..

سعد (مقاطعاً) غير أعز ما تملكي ده مايجبش ربع جنيه.. كان فيه

ايه من غير ماتهولي ؟ ٠٠

عواطف (وهي تعد علي أصابعها) .. كان فيه فلوس وذهب وألماظ

وحجج و ...

سعد (مقاطعاً) .. وياقوت ومرجان وأسهم وسندات ورخصه سلاح

كمان لو حبيتي ..

عواطف (لكرم) .. شفت يـأستاذ كرم .. سمعته وهو بيتريق علي ..

كرم (لعواطف) .. أصل اللي بتقوليه حضرتك حاجه تنحط في

شوال مهول .. واللي أعرفه ان مافيش شوال قده يتحط في

صندوق زبالة ..

سعد (لكرم و هو يشير لصدره) .. ولا الخزنة الخاصة اللي تأمن

عليهم فيها ..

ناهد (لسعد محذره) .. وبعدين معاك ياسعد .. تحطه مطرح ما

تحطه وياللا خلصنا علشان نروح نصرف المليون ..

عواطف (وهي تقوم بحركات رخيصه أمام كرم) .. بقول ياسى كرم ..

ايه رأيك ياخويا لو تاخذ نمرة موبائنى وتكشف عليها في

الجرنال .. موش جايـز تكون كسبت هي روخره وساعتها أديك

الحلاوه وأنغنـك ..

سعد (لكرم ضاحكا) إبسط ياعم دى بينها ناوية تطلعك من الوحدة

اللي انت فيها ..

عواطف	(لسعد مبتسمة) و فيها إيه .. قال على رأى المثل .. واحداني مع واحدانيه يعيشوا في هنا ميه ميه ..
ناهد	(في تقزز) .. إخص عليكي ست ماتختشيش ..
عواطف	(بطريقة الروح) .. في الحلال ياغنيه موش زى اللي في الأوضه وبيكتم عليه منك ومن المحروس ..
سعد	(محذراً لعواطف) .. لحد كده وكفايه ياست انتي .. اللي في الأوضه ده ومكتمين عليه موضوع يخصك مايخصناش ..
عواطف	(في حده) .. إمشى جاك قطع لسانك .. أنتوا هاتعملوا العمله وتلزقو هالي ..
كرم	عملة ايه ياست عواطف ..
سعد	(لكرم ليليه عنها) .. ماتاخدش علي كلامها وخليك معايا ..
	مكن تسلفني ألف جنيه لحد بكره واكتبلك بيهم وصل أمانه ..
كرم	(لسعد في لطف) .. وصل أمانه .. هو معقول يأستاذ سعد ربنا يكون راضى عن بني آدم بالصوره دى وحد ياخذ عليه وصل .. ده كلام .. (ثم وهو يخرج النقود من جيبه) ..
	اتفضل دول ألفين خليه معاك وأى وقت تجيبهم مافيش مشاكل
سعد	(بعد أن يمسك بالمبلغ) .. متشكر جداً .. (ثم يعد خمس ورقات من فئة المائة جنيه ويقدمهم لعواطف) .. إمسكى .. ده الإيجار المتأخر علينا ..

عواطف	وإيجار الشهر اللي جاي ..
سعد	تاخديه ان شاء الله من اللي جاي ..
عواطف	(في دهشه) .. إيه هاتعزلوا !! ..
سعد	(في لهجة تهكم) .. وإيه الغريب فيها .. ما كله بيعزل .. ساعات من البيوت وساعات من الوظيفة • • لكن العزال الأكيد هو اللي من الدنيا وبيبقى متعب قوى للي ماسك فيها يا ست عواطف ..
عواطف	(وهي ترفع يداها للسماء) .. الحمد لله أنا عمرى ما كنت ماسكه فيها .. أنا مأبده ..
سعد	(لناهد آمراً) .. لمي الهدمتين اللي ينفعوا ياناهد وياللا بينا ..
ناهد	(في سعادته وهي تتجه نحو غرفه لتدخل) .. محضراهم وحياتك ..
سعد	(بلهجة ذات مغزى) .. ولميتى للباشا اللي هايشرف حاجة من هدم إخوانه .. ولا ننزل نشتريله
ناهد	(هامسة له) .. انا كنت باضحك عليك علشان أنحررك و تدور على شغل ..
سعد	تتحرريني ولا تلخبطيني ..
ناهد	(بلهجة أسف) .. حقك عليا و أوعدك مش هاتحصل تانى
سعد	(لكرم) .. موش عارف أقولك إيه يأستاذ كرم ..
كرم	ماتقولش حاجه .. انت انسان تستاهل كل خير .. والحمد لله اني

كنت فيه حنة سبب ..

سعد (وهو يفتح كلتا ذراعيه ليحتضن كرم) .. ربنا يدريك من
ضميرك الحلو و يوفئك ..

كرم (وهو يتراجع ليصافح سعد) .. ويوفئك انت كمان .. (ثم
وهو يمضى للخارج) .. بعد أذنكم ..

سعد (وهو يتابع كرم في تعجب) .. مع السلامه يامحترم ..
(تخرج ناهد من الغرفه وهي تحمل حقيبته متوسطه للملابس
وكذلك بعض لعب الاطفال وتتوقف لتتأمل نحو عواطف تارة
ثم نحو سعد الصامت تارة أخرى ويبدو عليها الدهشه
للموقف) ..

ناهد (لسعد) .. هانمشى ولا لسه ..
سعد (يبدو أنه قد تذكر شيئاً ما ويتجه نحو الغرفه ثانيه) .. ثانيه
واحد .. فيه حاجه مهمه لازم أعملها ..

عواطف (بعد دخول سعد الغرفه وفي تحفز) .. أيوه لازم .. آمال
هاتسيبولي الزباله اللي بتجيلكم هنا ومبوظين سمعه البيت ..
(يخرج سعد وهو يحمل صندوق القمامه وقبل ان تجيب ناهد
علي إهانه عواطف) ..

سعد (وهو ينظر لناهد في عتاب) .. الزباله مابتجيلناش ياست
عواطف .. إحنا للأسف اللي بنروحها ..
ناهد (لسعد لتسترضيه) ٠٠ توبه ان عادت تحصل ..

(في دهشه وذهول) .. الصندوق ده صندوقى ..	عواطف
(في نكاء سريع ومفاجئ) .. اسكتي .. هو انا ماقولتلكيش ..	ناهد
(في تساؤل) .. لأ ماقولتلكيش ..	عواطف
موش كان فيه حرامى هايسرقه وأنا أخذته خبيته .. ولما عرفت ان فيه الشئ والشويات اللي قولتيهم قلت اتقلى عليها يابت لحد ما تقول اللى يلاقيه ليه الحلوة ..	ناهد
وانا طبيت ساكته ..	عواطف
(وهو يضع الصندوق وسط الصاله) .. الصندوق أهه فتشى فيه براحتك .. وانا متأكد ان اللي راح منك بالظبط بالظبط هاتلاقيه .. (ثم وهو ينظر لناهد) .. وده يعتبر في الحد ذاته أكبر حلاوه ليا في الدنيا .. (ثم وهو يمضى للخارج) .. سلام ياصاحبة مغارة علي بابا ..	سعد
(وهي تمضى في أعقاب سعد) .. فتك بعافيه يا قاسم ..	ناهد
(بعد خروجهم تتقدم نحو صندوق القمامه وتجلس وتحتضنه) .. ذهبي ..	عواطف
ياقوتي ..	ص/ سعد
مرجاني ..	ص/ ناهد
ألماظى ..	ص/ كرم
حججى ..	ص/ سعد
عماراتي ..	ص/ ناهد
أطيانى ..	ص/ كرم
(يبدو أنها قد جنت) .. هما زعلانين من ايه .. مالي ورجعلي .. أيوه رجعلي .. (ثم وهي تخرج ثمرة كوسه مبالغ	عواطف

فيها من الصندوق وتلوح بها للجمهور مبتسمه) .. والدليل
أهه .. طول ما دى موجوده كله هايرجع .. وهايرجع .. ومفيش
حاجه أبداً هاتعدى (فى إيكو) أبداً .. أبداً .. أبداً ..

" يسدل الستار أخيراً مع إضاءة صالة العرض "

الكاتب في سطور

- **مدوح فهمي** •
- خريج كلية التجارة في إدارة الأعمال •
- شرف بالخدمة في القوات المسلحة ضابطاً بالدفاع الجوي •
- حصل علي الدراسات العامه والتخصصيه في السيناريو من المعهد العالي للسينما •
- يكتب للمسرح والسينما والتلفزيون •
- عضو باتحاد الكتاب ونقابه المهن السينمائية وجمعية كتاب ومؤلفي السيناريو وجمعية كتاب ونقاد السينما والجمعية الأفروآسيويه للفنون والثقافه •
- قدم العديد من الأعمال التليفزيونيه والسينمائيه منها : **المشهد الأخير** – **جماد من لحم** – **شهادة ميلاد** – **بعد الرحيل** – **العميل رقم ١٣** – **دمعه علي خد القمر** – **نساء لا تعرف الندم** – **وحوش أليفه** – **نداء عاجل** – **جمعه وبطاقاته** **الشخصيه** – **الماسات الخضراء** • ومازال الزواج مستمراً – **لهيب الدم** – **أيام الخوف** وغيرها •
- نال الجوائز الأدبيه الأولي في المسرح أثناء سنوات دراسته الجامعيه •
- فازت مجموعته المسرحيه (**المداوله بعد الحكم أحياناً**) بجائزة محمد سلماوى عن النص المسرحي من اتحاد الكتاب •
- كرمت بعض أعماله الدراميه **كبعد الرحيل** – **وجماد من لحم** في بعض من القنوات الفضائية العربيه •
- أحتفل بعمله للخيال العلمي (**الماسات الخضراء**) من جمعية كتاب ومؤلفي السيناريو بعرض الفيلم وندوة عن كيفيه صياغة الروايه بروية السيناريست •

إصدارات وأعمال جديدة للمؤلف

صدرت له دراسة عملية عن (العلاقات العامة وفنون الممارسة) وفيها (يتناول سمات الشخصية، أبعاد المهمة، تنمية العلاقات، المراسم والبروتوكول، فهم الاتيكيت، اجندة الانطلاق).

صدرت له مسرحية (حاصروا المنطقة) وهى من ثلاث فصول

صدرت له المجموعة المسرحية (المداوله بعد الحكم احيانا) وتضم ثلاث مسرحيات من فصل واحد (الدفاع الاخرس، شرف القتلة، المداوله بعد الحكم احيانا)

صدرت له المجموعة المسرحية (السادة والأسياد) وتضم ثلاث مسرحيات من فصل واحد (حدوة الحصان، انين الذئاب، السادة والأسياد)

صدرت له ثلاث مسرحيات جديدة ومنها التى بين يدى القارئ الان وأخرى بعنوان (كبسة زر) و الثالثة بعنوان (وأخرتها)

تحت الطبع مجموعة الجديدة للإسكتشات المسرحية بعنوان (الإستوديو) وايضاً كتابة للقصص القصيرة بعنوان (جنس ادم) انتهى من كتابة فيلمه الجديد بعنوان (الغضب) وهو من الخيال العلمى

يعمف حالياً على كتابة الحلقات الأخيرة من مسلسل التليفزيونى الجديد (نار وجليد)